

**Date – 27/03/2024**

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

1. Lok Sabha member thlanna kal chho mekah tlin ngei tumin state chhunga party hrang hrangin beihpui an thlak chho tan mek.
2. Mizoram Chief Election Officer (CEO) Madhup Vyas-a'n Lok Sabha inthlan neih chhoh mekah inthlan muanawm leh felfai a awm theih nana thawhpuih Mizoram mipuite a sawm.
3. Mizoram pum huap chanchinbumite intelkhawmna MJA chuan ninin khan Gen. Conference hmangin hruaitu thar an thlang.
4. Prime Minister Narendra Modi-a'n ninin khan Belgian Prime Minister Alexander De Croo-a kawmin thil pawimawh hrang hrang an sawi dun.



### **LS ELECTIONEERING**

Lok Sabha member thlanna kal chho mekah tlin ngei tumin state chhunga party hrang hrangin beihpui an thlak chho tan mek.

Rorel lai Zoram People's Movement (ZPM) party chuan thla thar April ni 1 atangin Lok Sabha inthlan campaign beihpui an thlak dawn.

ZPM hian thuchhuah siamin Campaign hi Aizawl Vanapa Hall-ah an tan dawn tih an sawi a. Chief Minister Pu Lalduhoma chuan he hunah hian thu a sawi ang a, President Pu Lalliansawta bakah party hruaitu lian dangte he hunah hian an tel ang.

Indian National Congress pawhin naktuk atangin Campaign beihpui an thlak tan dawn a, state chhunga eptu party lian ber Mizo National Front (MNF) leh BJP hruaitute chuan campaign bul an tan tawh tih an sawi.

April ni 19-a Mizoram Lok Sabha bial inthlan vote thlak turah candidate 6-in an chuh dawn tih a chiang tawh a, mi 5 hi political party-in an dintir an ni a, 1 chu independent a ni.

Mizorama Lok Sabha inthlanah hian Congress party chu vawi 6 a chak tawh a, MNF vawi 2 chak tawhin kum 2017-a din ZPM chuan a vawi khatna atan party malin Lok Sabha inthlanah hian an ding dawn a, ZPM hian kum 2019 khan Congress nen candidate intawm an lo nei tawh a ni.

Kum 2019 Lok Sabha inthlanah khan MNF party chuan vote awm zawng zawng atangin zaa 44.89 a hmu a, ZPM leh Congress tangdunin dawtin zaa 43.26 an

hmu a, BJP in zaa 5.75 percent hmu in People's Representation for Identity and Status of Mizoram (PRISM) chuan zaa 2.67 per cent an hmu a, 2.94 per cent chu independent candidate pahnih ten an hmu bawk a ni.

Lok Sabha inthlanah hian Mizoramah chuan April ni 19-ah vote thlak a ni dawn a. State pumpuiah vote nei mi Nuai 8 Sing 6 Sang 1 leh 277 an awm a, hmeichhe voter Nuai 4 Sing 4 Sang 1 leh 520 an awm a, mipa voter Nuai 4 Sing 1 Sang 4 leh 777 an awm bawk.

(Desk)

<><><>

## **CEO MADHUP VYAAS**

Mizoram Chief Election Officer (CEO) Madhup Vyas-a'n Lok Sabha inthlan neih chhoh mek leh thla thar ni 19-a vote thlak turah inthlan muanawm leh felfai a awm theih nana thawhpuih Mizoram mipuite a sawm.

CEO hi nimin khan a office-ah Akashvani Aizawl Regional News Unit chuan a kawm a. Pu Madhup Vyas-a chuan MP inthlan vote thlak ni chu thla thar ni 19 a nih thu sawi nawnin inthlan chuh tuma hming pe lutte inhnuhdawh hun atan tun thla ni 30 thleng hun hawn a ni a, June ni 4-ah vote chhiar a ni ang, a ti a. Lok Sabha inthkanpuih hian Mizoramah voter nei mi Nuai 8 Sing 6 Sang 1 leh 277 an awm mek a, chung zinga Sing 4 Sang 1 leh 477 chu mipa an ni a; hmeichhe voter Sing 4 Sang1 leh 520 an awm bawk a, District 11-ah polling station 1,276 a awm mek bawk.

Kumin MP inthlanpui atang hian EVM/VVPAT model thar ber M3 chu hman tan a ni dawn a. ECI chuan VVPAT leh EVM thahnem tak a rawn dah tawh a. First Level Checking (FLC) neih tawh niin chung zingah chuan Ballot Unit 2,158, Control Unit 2,195 leh Voter Verifiable Paper Audit Trail (VVPAT) 2,228 te chu vote thlak huna hman theih mai turin District tinah venhimna khauh tak hnuaiah a awm vek tawh a ni.

Tun thla ni 16 atang khan Model Code of Conduct chu Mizoram ah hman tan a nih thu te, hemi dan pela kal lui te chu dan hmanga hrem theih a nih thu te, Model Code of Conduct hman tan anih atang hian party candidate, party hrang hrang bakah sorkar hnathawkte chu danin a huam chin baka che lo turin CEO chuan a ngen a ni.

(Corr)

<><><>

## **MJA GENERAL CONFERENCE**

Mizoram Journalists' Association (MJA) General Conference vawi 50-na chu nimin khan Aizawl Information & Public Relations (I&PR) office building-a Lianchhiari Run-ah hman a ni.

He hun hmanpuitu I&PR Addl. Secretary Pi Betsy Zothanpari Sailo chuan chanchinbumite chu mipuite thu thar hriatna hnar ber leh mipui suktlek kaihuai theitu an nih avangin an hna a pawimawh em em a, tan bik nei loa lai taka thawh leh chhui zuia chhuih zui ngai lam chanchin thar ngaihven peih turin a chah a. Thuchhuah turah fimkhur a ngai hle a, mahni hamthatna um ringawt lova mahni hna ngai pawimawh reng tur te, fimkhur leh uluk taka thu chhuah thin turin a chah a. Hnamdang te hmuh theiha Mizoram hmel mawina pho lang tam tur leh state chhunga sawrkar hmalakna te pho lang tam turin a chah bawk.

MJA President Pu C. Lalrambuatsaiha chuan MJA inzawmkhawmna a ngheh zual theih nan intlawhchhuah a pawimawh a; tun dinhmunah sum lama harsatna a

awm rih avangin harsa rih mah se sawrkar bel chungin hmalakna kalpui mek a ni, a ti.

MJA General Conference hi hun thumah thenin Hun khatna hman zawh hian kum hnih chhunga MJA hruaitu thar thlan a ni a. President atan President tang lai Pu C. Lalrambuatsaiha thlan nawn a ni a, Vice President-ah chuhtu awm lovin Pu C. Lalhmachhuana tlinga puan a ni a, Treasurer-ah General Secy tang lai Pu Lalrinmawia Sailo thlan a ni a; Executive Member mi 11 thlang chhuak bawkin, an zing atang hian President-in a thawhpui tur Secy. hrang hrang ruat ang.

Mizoram pumah MJA member 192 an awm mek a. Aizawlah 91 awmin Lungleiah member 20 an awm a. Siahaah 12 awmin Champhaiah 17 an awm a. Kolasib-ah 14, Serchhipah 14, Lawngtlaiah 10, Mamitah 8 leh Hnahthialah member 6 an awm a. I&PR Department in Mizoram Press Accreditation list-a siamah Accredited Journalist mi 142 an awm mek.

**(DESK)**

<><><>

### **SEMINAR ON MEDIA, LAW AND ETHICS**

Mizoram State Legal Services Authority, Govt. Mizoram Law College leh Govt. Aizawl North College-te tangho chuan nimin khan Gauhati High Court, Aizawl Bench Conference Hall-ah Seminar on Media, Law and Ethics an huaihawt a. MSLSA Executive Chairman, Gauhati High Court Judge, Justice Michael Zothankhuma'n a hmanpui a. He hunah hian chanchinbumite, Law Professional, Youtuber te leh sawm bik te an tel.

Justice Michael Zothankhuma chuan seminar-a thupui hrang hrangte inkaihnhawih dan sawiin, Ethics chu mahni chhungril lam nun vawngtu tur atana dan siam, mihring nunho nan leh ni tin mimal nuna tih tur mawi leh tha zawk duan hi a ni a, Law ve thung erawh chu pawn lama mi vawngtu, khawtlang inrelbawlna kawnga tih tur leh tih lo tur mumal tak siam hi a nih thu a sawi. Media chuan chanvo pawimawh tak an chelh thu pawh sawiin, tunlai chhanah chuan law leh ethics khaikawptu, mipuite puitu tur, aw neilote tana aw siamsaktu an nih avangin thu dik leh hleih nei lo pe chhuak a, dan nena thudik pekchhuah kawnga tan kawp tlat a tul thu a sawi a ni.

He hunah hian Akashvani Aizawl, RNU-a Copy Editor Pi Irene Lalruatkimi leh mi thiam dangte'n thu pawimawh hrang hrang sawiin an zirtir a ni.

**(I&PR)**

<><><>

### **LUNGLEI – POLLING PARTY 1<sup>ST</sup> RANDOMIZATION**

Lok Sabha inthlan vote thlak ni-a duty turte Duty-na tur hmun siam rem thawh khatna chu nimin khan Lunglei District Election Officer, DC Pi Ramdinliani kaihruaiin a Office-ah neih a ni a, hetah hian polling party te chu Assembly bial 6-ah sem darh an ni a, an duty-na tur polling station leh tul dang siam rem turin tum hnih dang thutkhawm leh a ni ang.

Lunglei Dist-ah hian Pink polling official te tiam lovin mipa hlang Presiding Officer (PRO) 188; Asst. Presiding Officer (APRO) -188 leh Polling Officer (PO) 279 an awm a. Polling Station 176 awmah hmeichhe hlangin an vil tur Pink Polling station 24 a awm a. Polling Party-ah hian Mipa reserved polling official zaa 20 an awm a, Pink PS tana reserved polling official zaa 30 a awm bawk.



## **KOLASIB DEO & BANK OFFICIALS**

Lok Sabha inthlanpui neih chhoh meka Candidate-te leh Political Party hrang hrangte senso vil dan tur chungchangah Kolasib District Election Officer (DEO), DC Pu LT Sanga chuan nimin khan Bank hrang hrang hotute a kawm.

DEO chuan Election Commission of India (ECI)-in inthlan hun leh ni tur a puan atang khan Election Model Code of Conduct hman tan nghal a nih thu sawiin, inthlanna felfai, langtlang leh thianghlim a awm theih nan inkaihhruaina hrang hrang zawm a tul, a ti a. Inthlan kaihhnawiha Candidate-te Campaign senso vil kawngah Bank-a thawkte an pawimawh hle a ni, a ti.

DEO bakah hian Election Officer, Pi Christina Lalmuanzuali chuan District tinah Political party ten Additional Expenditure Agent an ruat a tul thu leh ECI-in Candidate-te campaign senso a bithliah chin pel lo tura vil leh enpui a ngaih thu a sawi a. Hemi kawngah hian Bank-a thawkte nen thawhho a pawimawh avangin inthlang tura inbuatsaihna kalpui chhunga report hrang hrang pek ngaite ngai pawimawh turin kalkhawmte a ngen bawk a ni.

Kolasib DIPRO Pu Hmingthanzuala chuan mipuiin vote thlak an ngaih pawimawh theih nan ECI thuchhuak angin Systemic Voters Education & Electoral Participation (SVEEP) kalpui a nih thu sawiin Bank-te nen tangkawpa Financial Literacy Campaign an kalpui thinnaah Voter Awareness nen a kal kawp theih dan turte sawiho a ni.



## **PRIME MINISTER MODI & BELGIAN PRIME MINISTER**

Prime Minister Narendra Modi-a'n nimin khan Belgian Prime Minister Alexander De Croo a kawm a, kawng hrang hranga ram pahnihte inlaichinna tihchak lehzual theih dan tur a sawipui.

Prime Minister pahnihte'n an sawiho zingah hian sumdawonna, investment, technology thianghlim, semiconductor, damdawi, green hydrogen, IT, defence, port, leh a dangte a tel a. India leh Belgium inlaichinna tha an neih an duh thu Belgian Presidency hnuai Council of the European Union-ah India – EU Strategic Partnership tihchak belh zel an tum thu pawh an sawi.

Telephone-a an inbiaknaah hian Prime Minister Pu Modi-a chuan Belgium-in Brussels-a First Nuclear Energy Summit hlawhtling taka a buatsaih avangin lawmthu a sawi a. Ram pahnih leh khawvel pum huap hmasawonna chungchangah ngaihdan an inhrilhtawn bawk.

